



Sesida dals

22 d'avust 2017

Communitgà ils

23 d'avust 2017

Protocol nr.

735

Dumonda Locher Benguerel

concernent l'augment da la violenza a chasa en il Grischun

Resposta da la regenza

Tar la dumonda 1: En la statistica criminala da la polizia (SCP) figureschan ils malfatgs en il sector da la violenza a chasa. La polizia chantunala posseda las indicaziuns davart il dumber da cas. In cas po cuntegnair plirs malfatgs, per exempel metter maun vi d'ina persuna, ingiuria, smanatscha e constringiun. L'onn 2016 figureschan 259 malfatgs ch'èn vegnids commess en 112 cas. L'onn 2015 eran quai 184 malfatgs en 92 cas. Ils onns precedents eran las cifras pli autas che quellas da l'onn 2015. En media èn vegnids quintads dapi l'onn 2013 circa sis cas supplementars per onn (circa 6 pertschient per onn). Ils motivs effectivs n'èn betg enconuschents. I vegn supponì ch'il dumber dals cas che vegnan annunziads s'augmentia tranter auter pervia da las mesiras da sensibilisaziun pertutgant la violenza a chasa.

Tar las dumondas 2 e 3: L'onn 2009 ha la regenza incumbensà il post da stab per l'egualitad da las schanzas ensemen cun ils posts da servetsch chantunals participads da far in rapport cuminaivel per realisar in project d'intervenziun. Sa basond sin las recumandaziuns da quest rapport ha la regenza concludì l'onn 2014 da stgaffir in post da coordinaziun cunter violenza a chasa e da surdar a l'uffizi dal servetsch social la cumpetenzza per quel.

Dapi sia creaziun l'onn 2015 ha il post da coordinaziun cunter violenza a chasa prendì mesiras per sensibilisar las personas d'instrucziun, garantì la colliaziun en ina rait cun las conferenzas naziunalas ed inizià la cooperaziun da las instituziuns e dals uffizis participads en il chantun. Ils proxims onns duai la cooperaziun vegnir approfondada, uschia che l'elavuraziun ed il tractament da cas da violenza a chasa duain vegnir meglierads ulteriuramain. Plinavant ston vegnir meglieradas las datas statisticas. La regenza vul cuntinuar cun las mesiras vertentas e previsas.

Tar la dumonda 4: La ratificaziun da la convenziun d'Istanbul è vegnida concludida da la confederaziun ils 16 da zercladur 2017. Ella entra en vigur probablamain il cumenzament a l'onn 2018. Tenor la missiva dal cussegl federal ademplescha la Svizra cun sias basas legalas e cun las mesiras da fin ussa da la confederaziun, dals chantuns e da las vischnancas per gronda part las pretensiuns da la convenziun. Quai vala er per il chantun Grischun. A partir da l'onn 2018 vegn probablamain ina grupp da lavur federala a coordinar las mesiras per realisar la convenziun d'Istanbul ed eventualmain a recumandar ulteriuras mesiras. Il chantun Grischun vegn a spetgar ed ad examinar questas recumandaziuns.

Tar la dumonda 5: Il chantun Grischun è obligà per lescha da metter a disposiziun alloschis d'urgenza per persunas pertutgadas da violenza (art. 14 da la lescha federala davart l'agid a victimas da delicts, lescha davart l'agid a victimas, LAVi; CS 312.5). Questa obligaziun ademplescha el en furma d'ina incarica da prestaziun cun la chasa per dunnas dal Grischun. L'incarica da prestaziun actuala scada la fin da l'onn 2017. Il mument han lieu discurs per prolungar l'incarica da prestaziun a partir dal 1. da schaner 2018. La chasa per dunnas è garantida sco alloschi da protecziun e sco purschida da cussegliaziun nunbirocratica, sch'igl è necessari.

La chasa per dunnas dal Grischun protegia dunnas pertutgadas da violenza, lur uffants e giuvenilas dal chantun Grischun e d'auters chantuns. La chasa per dunnas ha acceptà l'onn 2016 circa 30 dunnas cun lur uffants. En cumparegliaziun cun ils onns 2014 e 2015 èn quai tschintg cas dapli. Il dumber dals dis ch'ils letgs èn occupads da dunnas e d'uffants è dentant sa reducì durant la medema perioda. Entant che l'onn 2014 èn vegnids registrads anc 1336 dis ch'ils letgs èn occupads da dunnas e d'uffants, eran quai l'onn 2015 anc 991 e l'onn 2016 937 dis ch'ils letgs èn occupads. Durant ils onns 2014-2016 avevan fin 40 pertschient da las dunnas acceptadas en la chasa per dunnas dal Grischun lur domicil ordaifer il chantun Grischun.



En num da la regenza
La presidenta:

A handwritten signature in black ink, appearing to read "B. Janom Steiner".

B. Janom Steiner

Il chancelier:

A handwritten signature in black ink, appearing to read "Daniel Spadin".

Daniel Spadin